



April 2010

Innarluutilinnik isumaginnineq

Ukiakkut 2007 – Februar 2008:

Ilaqtariinnermut Peqqissutsimullu Naalackersuisoqarfiup ataani Suleqatigiisit at assigiinngitsut KANUKOKA-mit peqataaffigineqarput. Suleqatigiisit suliaasaqarfiup iluani qulaajaaneq suliaaraat.

Juni 2008:

Innarluutilinnik isumaginnineq pillugu Inatsisartut peqqussutaata allanngortinneqarnissaanut siunnersuut tusarniutigineqarpoq tassungalu atatillugu kommunit tusarniaavigineqarput. Ikaar-saariarnermi Ataatsimiititat amerlanerit nalunaarutigaat Namminersornerullutik Oqartussanit akisussaaffinnik tigusinissaq, aningaasatigut kingunerisassai ersarissumik nalilersorneqareertin-nagit tunngaviatigut utaqqissunneqartariaqartoq aammalu tusarniaanerup nalaani kommunit kat-tunnissaannut kommunerujussuannngortussallu isumannaatsumik ingerlasinnaanissaat piffissami tassani pingaarnertinneqarallartoq.

November 2008 – April 2009:

KANUKOKA-p ataani suleqatigiisit ingerlanneqarput kommuninit innarluutilinnik sullissisunik inuttaqartunik. Suleqatigiisitap suleqatigiisit siuliisa suliaat nangippai aammalu qinnuteqarnermi suleriutsit, kommunit namminneq innarluutilinnut angerlarsimaffiutiminnik ingerlatsinerminni suleriusaat allarpasuillu qulaajarlugit.

Maj 2009:

Suleqatigiisitap Kalaallit Nunaanni Danmarkimilu innarluutilinnik isumaginninnerup kiisalu Kalaallit Nunaanni innarluutilinnut ulloq unnuarlu angerlarsimaffiit 1. januar 2010 Kommuninut nuunneqarnissaat inassuteqaatigaa aammalu inassuteqaatigalugu KANUKOKA-p Naalackersuisullu akornanni isumaqatigiinniarnissani aningaasanut tunngasortai ilanngullugit isumaqatigiinniutigineqassasut.

Juni 2009:

Inatsisartunut qinersineq pivoq – Namminersorlutik Oqartussani inatsisinut tunngatillugu pia-reersaatit unitsinneqarput.

Oktober 2009:

KANUKOKA-p siulersuisuisa suliaassarfiit nuunneqartussat piareersaatigineqarnerisa killiffii oqaluuseraat. Kommunini ukiuni arlaqalersuni innarluutilinnik sullissinerup tiguneqarnissaanik kissaateqarneq tunngavigalugu, ilaatigut marloqiusamik allaffissornikkut sulinerup unitsinneqarnissaa aammalu suliaassarfimmik tigusinissaq kinguarateqqinneqassagaluarpat tamanna pitsaasuungimmat siulersuisut tunngaviatigut tapersorsorlugulu inassuteqaatigaat, innarluutilinnik isumaginninneq 1. juli 2010 kommuninut nuunneqassasoq. Inassuteqaatigineqarporli Innarluutilinnut ulloq unnuarlu angerlarsimaffiit, Innarluutilit pillugit Ilisimasaqarfik Siunnersuisarfiutigisoq kiisalu Danmarkimi Kalaallit Nunaata Sinniisoqarfiani sulisuusut piffissami ikaarsaarfimmi Namminersorlutik Oqartussaniiginnarallassasut, Kommuninut ataatsimoortumik ingerlatsivissaq pillugu ajornartorsiutit aaqqiivigineqarnissaasa tungaannut. Innarluutilinnut suliaassarfiup tunniunneqarneranut atasumik agguaasseriaaseq ullumikkornit naleqqunnerusoq kissaatigineqarpoq, taamaalilluni aningaasat innarluutilimmut atugassanngorlugit akuersissutigineqartut innarluutilip kommunerisaanut tunniunneqartalerlutik. Innarluutilik kommunimut allamut nuusappat inassutigineqarpoq inuttaanut akuersissutaasut malinnaatinneqassasut aammalu tamanna taamaaliornissamut siunertaqartumik kommunit akornanni isumaqatigiissusiassami allassimassasoq. Siulersuisut siunnersuutaat kingusinnerusukkut kommuninut tusarniutigineqassapput.

December 2009:

Ataatsimut isigalugu KANUKOKA-p siulersuisuisa innarluutilinnik isumaginninnerup 1. juli 2010 kommuninut nuunneqarnissaanik inassuteqaataa kommuninit pingasunit isumaqataaffigineqarpoq, Kommune Kujalleq isumaqartoq innarluutilinnik isumaginninnerup nuunneqarnissaa mianersuullugu suliarineqassasoq, aamma piffissaq atorneqartariaqartoq qanorluunniit sivilisgissagaluarpat, kinguartitsinerillu arlaqartut pisariaqassagaluarpataluunniit.

Februar 2010:

KANUKOKA-p ataani suleqatigiisitaq kommuninit sisamaasunit innarluutilinnik sullissisunik aningaasanullu tunngasunik suliaqartunit inuttaqartoq Kangerlussuarmi suliiitigaluni isumasioqatigiippoq. Kommunit tamarmik namminneq toqqakkaminnik sulisunik pingasunik aallartitaqarput. Suliitigaluni isumasioqatigiinnermi Isumaginninnermut Naalakkersuisoqarfiup ataani innarluutilinnut immikkoortoqarfimmi sulisut sisamat aamma peqataapput. Suleqatigiisitap suleqatigiisitap siuliisa suliarisimasaat nangillugit inassuteqaataasimasullu aallaavigalugit sulinermi periusissatut siunnersuutininik atortussanillu siunnersuuteqarnissaq suliaassaraa, taamaalillutik kommunit suliaassarfimmik tigusinerminni sapinngisamik aporfissaqarpallaaratik sullissineq ingerlassinnaaniassammassuk.

Suliitigaluni isumasioqatigiinnermi apeqqutit makku ilaatigut sammineqarput:

- Innarluutilinnut suliani nutaani kikkut aalajangiinissamut piginnaatinneqassappat
- Aningaasat missingersuutillu eqqarsaatigalugit qanoq suleriuseqartoqassava
- Akuersissuteqartarnermi periutsit suut atorneqassappat
- Innarluutilinnut akuersissutit qanoq aqunneqarlutillu nakkutigineqassappat
- Tapersorsorteqarnissamut akuersissutit qanoq aqunneqassappat, taakkumi aningaasanngorlugit nalingi innarluutilinnik isumaginninnermi annertunerpaammata
- Kommunip iluani aaqqissuussamik qanoq suleqatigiittoqassava

- Kommunit akornanni qanoq suleqatigiittoqassava

Marts 2010:

Isumaginninnermut Naalackersuisoq aamma Nunamut Namminermut Naalackersuisoq nalu-naarput december 2009- mi tusarniaanermi akissutit naapertorlugit ulloq unnuarlu angerlarsimaffiit Namminersorlutik Oqartussaniiginnarallartariaqarnerat Naalackersuisunit isumaqatigineqartoq aammalu *nuussinissamik, kommunillu ataatsimoorussamik ingerlatsivissaannut inatsisitigut tunngavissaannik pilersitsinissaq kingusinnerusumut kinguartinneqassasoq, nalilernerqarmat innarluutillit sullinneqarnerannut nuussinerup pitsaasumik ingerlalernissaa utaaqqineqassasoq ulloq unnuarlu paaqqinnittarfinnik nuussilinnikkallarnermi.*

April 2010:

Suleqatigiisitap suliitigaluni isumasioqatigiinnerata eqikkarneqarnera suleriesissanik siunnersuutitalik sananeqarpoq kommuninit isummerfigineqartussaq. Siunnersuutit kommunit namminnek kommuniminni atussallugit naleqqussorigunikkat atorsinnaavaat. Sulili amigaataapput Isumaginninnermut Naalackersuisoqarfiup sullissinermi nalilersuisarnissami atortussat sanajumallugit neriorsuutigisimasaat.

Isumaginninnermut Naalackersuisoqarfik

Inatsisitigut suliarineqarlutik Naalackersuisoqarfimmit ingerlanneqartut:

- Inatsisartut peqqussutissaattut siunnersuut Inatsisartuni siullermeerluni oqaluuserineqassaaq 20. april 2010 (siullermeerluni oqaluuserineqareermat Inatsisartut Ilaqutariinnermut Ataatsimiititaliaannut suliaannorlugi ingerlateqqinneqarpoq)
- Nalunaarutissatut siunnersuutaagallartoq Naalackersuisoqarfimmit suliarineqarpoq, naatsorsuutigineqarluni maj 2010-p naalernerani tusarniutigineqassasoq
- Taakku naammassippata Ilitsersuut naleqqussarlugu sananeqassaaq
- Naalackersuisoqarfiup pilersaarutigaa kommunini sullissisunik Nuummi 26. – 30. maj 2010 pikkorissaassalluni – (Innarluutilinnik sullissiveqarfiusuni Isumaginnittoqarfiit tamarmik innarluutilinnik sullissisunik marlunnik peqataatitsisinnaallutik)

Naalackersuisoqarfimmit nalunaarutigineqarpoq pikkorissaanissamut malittariuminartumik skema-liortoqassasoq, taamaalillutik kommunit ikiorsiissutinik qinnuteqartoqartillugu ajornannginnerusumik suliarisinnaasassamatigit.

Innarluutilinnik isumaginninnermi suliat ilaat

Isumaginninnermut Naalackersuisoqarfiup makku Namminersorlutik Oqartussaniiginnarallarnissaat kissaatigisimavaat:

- IPIS, Innarluutillit Pillugit Ilisimasaqarfik Siunnersuisarfiuutigisoq. IPIS-p pingaarnertut sullitarai innarluutillit, qanigisaasut, sullissisut kiisalu ulloq unnuarlu angerlarsimaffiit,

siunnersuineq kalaallisut ingerlanneqartarluni aammalu nunatsinnut tulluarsagaalluni. IPIS-mit pilersaarutaavoq siunissami Nukittorsartarfissamik kiisalu iluaqusersuutitut inissiiviusartussamik pilersitsinissaq. IPIS nuna tamakkerlugu sullissisuvoq kommuninullu kiffartuussisinnaalluni

- Tusilartunut siunnersorti, nuna tamakkerlugu kiffartuussisussa
- Innarluutilinnut immikkoortorta qarfiup sulisui 2010-p naanissaata tungaanut Namminersorlutik Oqartussaniiginnarallassapput suliasa qarfiullu 1. juli 2010 kommuninut nuuneqarnerani kommuninut siunnersuisutut atuuttassallutik
- Reffnæs-imik suleqateqarneq ingerlatiinnassavaat, tassanngaani Kalaallit Nunaanni meeqqat inuusuttullu isigiarsuttut siunnersorneqartarput, nunatsinnut ornigutinngikkaluarlutik siunnersuisarlutik aammalu tikeraarlutik siunnersuisarlutik
- Naalackersuisut isumaqarput (marts 2010) Innarluutilinnut ulloq unnuarlu angerlarsimaffiit Namminersorlutik Oqartussaniiginnarallassasut kommunillu ataatsimoorussamik ingerlatsivissaannut inatsisitigut tunngavissaannik pilersitsinissaq kingusinnerusumut kinguartinneqassasoq. Tamatuma nassatarissavaa qanoq iliornissap paasinarsinissaata tungaanut innarluutillit ulloq unnuarlu angerlarsimaffinnut inissinneqartunut kommunit aki-liisannginnerat ingerlaannarallassasoq

Namminersorlutik Oqartussanit paasissutissat amigaatigineqartut pisariaqartinneqartullu tigu-neqarpata aningaasanut / ataatsimoortumik tapiissutitut tunngasut pillugit immikkut oqallissisamik sanasoqassaaq.